

Sier Michiel di Stephano, nave di sier Francesco Malipiero et fradei	ducati 1000.—
Sier Vincenzo Saraton, nave di sier Piero Barbo e compagni	» 437. 6
Sier Piero da Liesna, nave di sier Filipo Bernardo et fradeli	» 1680.—
Sier Etor Otobon, nave di sier Al- vixe di Prioli e compagni	» 611. 8
Sier Marco Bosina, nave di sier Bernardin Loredan e compagni	» 253. 4
Sier Stefano di Matio, charavela di sier Zuan Bragadin et fradei	» 255.21
Sier Damian Bontà, navilio di sier Alvixe Contarini	» 416. 3
Sier Francesco Felician, nave di sier Jacomo di Rizado	» 509. 9
Sier Zuan de Bonin, caravela di sier Piero Querini	» 301. 9
Sier Christofal da Curzola, caravela propria	» 269.19
Sier Januli de Nichosia, di sier An- drea Contarini	» 444.22
Sier Michiel Cingano, di sier Hironi- mo Querini	» 279. 6
Sier Marco di Michiel, di sier Mathio Loredam	» 52. 7
Sier Zuan Mauro, caravela propria	» 194.—
Sier Lunardo de Mastin da Corfù, caravela propria	» 342.13

Summa . Ducati 12895. 2

43 A dì 16 fecher. Fo gram conseio, e fu fato ducha in Candia, in luogo di sier Zuam Morexini, non era andato al tempo, sier Marco Barbo, el consier. Fo soto in scurtinio balote sier Nicolò Michiel, dottor e cavalier, avogador, et 200 balote in gran conseio, qual vene triplo, et il Barbo vene dopio, et il Michiel non rimase, perchè la brigata vuol meni sier Antonio Grimani, come ha sempre ditto, in gran conseio, e come el vuol far, e poi farlo in suo locho procurator.

In questo conseio, per Zuan Jacomo, fo leto una parte presa nel conseio di X con la zonta, a dì XI di questo, che tutti li debitori di volte di l'oficio dil sal, debino pagar per tutto questo mexe, senza pena; passato, siano astreti pagar per li provedadori sora i officij, a chi è comesso; et altre stretture, *ut patet in ea*.

A dì 17 ditto. Da poi disnar, fo pregadi. Et prima la matina in colegio fo molte letere, parte di le qual dirò di soto.

Item, se intese el re di Franza haver saputa la nuova di l'intrar di Aseanio, per via dil Triulzi, in tre dì e mezo, manderà francesi assaissimi, à dà le terre a sacho, e fatto e dito che li son state rebelle, e *precipue* Milan, et a 1/2 marzo sarà in Italia lui im persona con gran zente. *Item*, si have Triulzi esser in campo con 16 milia persone, havia tolto l'aqua dil navilio a Milan *etc.* Et che quelli dil castello non havia trato 4 zorni molto a la terra, e questo perchè monsignor de Rozom, era castelan, amalato, stava mal et morite; qual la note che 'l morite, tretieno assa' bombarde et fuogi a la terra. Et il signor Lodovico, versso Pavia, deva danari a zente, et deva fama ne veniva assa' todeschi in suo favor, et havia scritto una letera al Triulzi, prometendoli gran cosse: la qual letera esso missier Zuan Jacomo la mandoe de qui. El qual Triulzi con francesi sono mia 7 lontan di Milan. Et a Milan quelli di Lodovico feva repari a li bastioni, dubitando esser nozuti dal castello, che *continue* trazeva. Et par che, non havendo danari, li citadini di Milan pagano le zente dil suo; et molte fameie di Milam, con le donne et quello poteano, si partivano da Milan, venendo habitar su le terre nostre, a Bergamo e altrove. Et quelli rectori scrisse a la Signoria quello dovessero far. Risposto, li acetasse; ma li mandasse ad habitar a Vicenza o Padoa. *Item*, non voglio restar di scriver, che a Milam, prima el formento valeva lire 9 el ster, hora val lire 5; ch'è segno li citadini vendeno per fuzir, per non andar a sacho.

El marchexe di Mantoa par habi auto uno comandamento dil re di romani, debi cavalchar in favor di Lodovico, el qual par habi mandà il signor Zuane, suo fratello, a Milam, si dice per tuor da Lodovico 15 milia ducati, et il comandamento fato a uno per fuogo stagi in hordine; *tamen* fin qui non si move.

Da Ferara, di sier Hironimo Donado, doctor, vicedomino nostro. Come el ducha li era venuto a parlar, dolendosi che la Signoria l'avia messo al ponto con il re di Franza, et lui esser bon fiol. Et mostrò una letera di l'orator nostro è in Franza, di 26 zener, scrivea a la Signoria, come il re voleva castigar Ferara et Mantoa. Et zercha questo, scrive gran cosse. La qual letera era stà intercepta, e capità in le sue man; et la dete al vicedomino, qual la mandò a la Signoria, et che à gran paura, nè più va a le chiesie; et par in dite letere che 'l re habi dito, 43 come vol venir im persona in Italia, et haverà 1500 lanze et 12 milia sguizari. Conclude esser in gran amor con la Signoria nostra.